

Pagiguk Iri Shup Douk Jon Nenekap Iri

Banenyi Baraen Um Enyudok Nyagiguk Iri Baraen Jon Neneken Iri

ves 1-3 Jon nanadudareh um eshesh Kristen aria nakripesh Iruhin ananin yopinyi baraen um nutaurumesh

ves 4-11 Adurihi aih hani ehudok aih um apak urkwip apa panawasham kupaishi um

ves 12-13 Nyatuh iri baraen

¹Eik debeiwe iri um ipak pasuhw Iruhin ananin baraen iri yeneku baraen um apudok shup. Yenekapumagu um nyak armatok^a douk Iruhin nanagraehen nyape ananin iri nyani nyakish batowish. Eik adur urkum manawashamep abom. Aria douk madae eik atuwe urkum munawashamep uwe, uwok. Ihishmorim shadukemesh um adurinyi baraen shagipeshen iri douk shopunek urkwip panawashamep. ²Um mareshe? Enyudok adurin atinyi baraen douk nyape apak aria ta nyupe abom ihih nyumneh. ³Aria apak miyagwreh adurin atinyi baraen aria urkwip punawasham kupaishi um, Yain Iruhin nini Jisas Kraish apakin Yain ananin Nuganin ta henek gihaumap hutaurumap meyoh aria hunekap aparuh hur wosik.

Apak Ta Mugipesh Ehudok Aih Um Urkwip Punawasham Kupaishi Um

⁴Eik yanadudareh abom um agundok yemnek um enesh nyakish batowish shagipesh adurinyi baraen um. Shagipeshen kabi Yain nakripap dodogowinyi baraen um mugipeshen um. ⁵Aria douk eik yakri iwemum enen baraen aria ikripen namudok nyak yopukwi armatok abom. Apak ihishmorim atin atin ta urkwip punawasham um. Enyudok lo douk yakripenyumen iri, enyen douk madae ikripen enen namunyi lo uwe, uwok. Enyen douk seiwok wata sagomatin maraen madukemen iri.

^a **1:1** Enyudok baraen, enesh shakri adurik armatok kwani okwokwish batowish. Aria enesh shakri Iruhin ananish arpesh douk apa shantorum shenek lotu anabur wabur iri.

⁶Baugos um agundok apak urkwip punawasham kupaishi um douk namudok. Apak mupe um mugipesh Iruhin ananin lo. Enyudok lo douk watak sagomatin ipak ihipmorim pemneken iri. Enyen douk nyakri namudok. Ipak ta urkwip punawasham abom kupaishi.

Apak Musuhw Kraiss Ananin Baraen Dodog Abom

⁷Sabaimi armam harahe hanak sabaigunum agundok atap iri, amam douk hakri hunek rohwmup. Amam douk hapeum hakri Jisas Kraiss anan douk madae nutogur adurinyi arpen uwe, uwok. Amudokmori armam douk hapeum henek rohwi iri. Aria amam douk Kraiss ananim horim. ⁸Ipak gamo pudukemesh um ta mare puraoyopishi eshudok eneshenesh douk penek mour um kweipon ta puraesh iri. Aria puraesh piyatesh abom um douk ta wosik. ⁹Meishi arpesh douk madae shusuhw Kraiss ananin baraen dodog abom aria shakutinyukuk shagipesh kupainyi iri, eshesh douk madae Iruhin nupenyesh uwe, uwok. Aria eshudok douk apa shasuhw abom enyudok yopinyi baraen dodog iri, douk Yain nani Nuganin douk hapenyesh. ¹⁰Meishi arpesh shunakumogu ipak aria madae shusuhw enyudok baraen iri uwe, ipak mare puraesh shini ipak pupe ipakig urusag o pukri pukesh roguhwi punadudareh-umesh, uwok. ¹¹Meishi arpesh douk shukri shukesh roguhwi aria shunadudareh um eshudok-mori arpesh iri, eshesh douk ta shuni eshesh atin baraen. Aria ta shuni eshesh shanoprom um yoweishi inahos eshesh shenekesh iri.

Nyagikuk Iri Baraen

¹²Eik sabainyi baraen douk yakri inyemepogu um ipak apudok shup iri. Aria yakri uwok um inyemagu shup meyoh, uwok. Yakri inaku itrip aria mupe atugun miyagwreh meyoh um douk ta munadudareh abom muriguk.

¹³Nyakik wawik^b douk Iruhin nagraehok um kwupe ananik nugawik iri, okwokwish batowish douk shenemenyagu yopuhi nyumnah nyak.

^b 1:13 Tik futnot um 2 Jon 1:1